


قورقود دده مه نيسگيللى سوزلريم



بولوت قاراچورلو (سهند)

وب اوچون حاضير لايان:

كجیل

<http://www.Gajil.20m.com>

گنجه دير، عالمه چوكوب قارانليق
افقلىر تاپدانيب يئره يامانيب
هر يان، قوو وورورسان قولاق توتولور
فيكيرده، دويغودا، دونوب دايانيب

آي كوسوب اوز قويوب زهره يه ساري
گونش يولوب توكوب زرلى ساچلارين
ظلمت بايراق آچيب يئرين اوزونده
دگيشيب عالمين قايدا - قرارين

بير چاقالدا هورمور، قورددا اولامير
بايقوشلاردا باشين چكيب قينينا
اولوم قواند گريب يئرين اوزونه
هر شئى شبهه لنير وار اولدوغونا

كوشنى بوروين سو كوت اليندن
سو كوت جانا دويور، فريادا گلير
داريخيب هوو كوروب هاراي چكير م
دره لر ديسگينيب، داغلار ترپنير:

- اولدوزلو گويلره - آيلى گويلره
قوزقون كيمي قاناد گه رن بولودلار!
دومانلار اچيندن، چنلر اچيندن
جانبخميش بير انسان سيزى هارايلا!

اهرمنلر، دوزاق قوروب يولومدا
قورخورام - قورخورام من قارانليقدان!
دشين شاقيلدادير، برلدير گوزون
هر كولون ديبيندن، منه بير شيطان

گونشى سالسادا گنجه قويويا
يئنه ده گويلرده، اولدوز وار، آي وار
دئير لر گنجه لر يولدان آزانلار
اولدوزلارا باخيب، يولونو تاپار

چكيلين، چكيلين، چكيلين آمان!
عومرومون گويوندن چكيلين بير آن!
قويون ايشيق سالسين يوللار يما آي
يولومو سوروشوم من اولدوزلاردان

اولدوزلار، اولدوزلار، آمان اولدوزلار
نه دن گوز باسماييب پاريلداشمير سيز؟
هارداسيز؟ هارادا ايتيب باتيب سيز؟
نييه ساكيت - ساكيت پيچيلداشمير سيز؟

يوخسا باتاقليقا باتيبدى ((بهرام))؟
((كيوانين)) غصه دن بو كولوب بئلى؟
((اولكرين)) سالخيمي پوسگوندن دوشوب؟
((زهرة)) نين سازينين قير يليب تنلى؟

سانكى بولوتلاردا يوخويا باتيب
بختيمدن گويده بير شيمشكده شاخماز!
بستانچى بابادا باش آتيب ياتيب
چاخماغيني چالماز، فنارين ياخماز!

اولدوزلار اوزاقدير، سمالر درين
انسانا يئردندى وارسا هر هاراي
يوز بئله باغير سام، سيتقاسامدا من
يولونو دگيشمز گونش، اولدوز، آي

هله لیک بو منم، بودا قارانلیق
گوزلریم بره لیر قارا ظلمته
باشین قارانلیقا دویور باخیشیم
بلکه بیر یول آچا نورانیته

آنجاق هر گنجه نین دالی گوندوز دیر
هر بیر فلاکتین قور تولوشو وار
حیاتین یوللاری دره - تپه دی
هر یئیشین ایسه، بیر یوققوشو وار

اورک چوخ دردنیر، گوز چوخ یاشاریر
لاکن حیات بوتون درد و غم دئیل
بو آجی گونلرین، شیرینی ده وار
عومور تک توی دئیل، تک ماتم دئیل

هر دردین داواسین آختارماق گرک
نه چیخار بیخیلیب زار یلداماقدان؟
تلاشسیز قوللارین قووتی اولماز
یول گنجه سه چاتماز مقصده انسان

سحری آختاران گنجه دن قورخماز
آلیرام الیمه تلاش عvasین
اگر گویدن یئره قطران یاغسادا
اوزوب گنجه لیم ظلمت دریاسین

امید هر نه قدر ضعیف اولسادا
بوتون دوگونلری بوشالدار، آچار
امید بیر قیغیلجیم، بیر قور اولسادا
تونقالار یاندرار، آلولار ساچار

یئنه باغیر یرام، هارای سسیمدن

دره لر ديلله نير، داغلار سسلنير
يئر - گوى فر ياد يمدان زنهارا گلير
قايلار ديسگينير، داشلار تر پنير

سانكى بير اشارتى گوز وورور منه
اوزاخدا جانسيز بير ايشيق پارالايير
ائله بيل گنجه نين اودويا بيلير
يادا قارانليغين باغرى چاتلايير

ايشيقدان اوزانان ضعيف شوعالار
باغلانير كونلومه قزىل بير ساپ تك
منيده اوزايله چكير آپارير
او بير يوماق كيمي، سر يتله نرك

قاپى - پنجره سيز بير آبدده ده
هانسى نيازلى ال بير شام ياندير ميش
محتاج بير كونولون بوش التجاسى
بو سونوك او جانغى ايشيقلاندير ميش

بوردا كيم وار منه يول نشان وئر؟
بير برباد بنا دير، بير قورتار ميش شام
بو شام چكر اولسا سون نفسلرين
مطلق قارانليقداء، بوغالا جامام

هيسلى تاخچالاردا، ساخسى پوسوزلر
اوستونه قات با قات توز - تور پاق قونوب
ياخيلان شاملارين ايستى گوز ياشى
توكولوب، هر ياندا لاي با لاي دولوب

بوردا بوز باغلايب دونيبدير داشا
حاجتلى گوزلرين توكديگى ياشلار

باغلی دوگونلری آچانماسادا
منیم گنجه می کی ایشقلانديرار

توزلو پوسوزلری پی له دولدوروب
یانديریرام، شامین سون شعله سینه
بیر آندا آبدہ چراغبان اولور
سوندیگی شاملارین، گدازه سیله

ایشیق قارانلیقی قووورائشیکه
گورونور بیر سگگیز بو جاقلی بنا
اونومو قورودیر مرموز بیر جذبہ
کونول مفتون اولور باخدیقجان اونا!

تاخچالاردا ییغیم - ییغیم کار - کاغاذ
جیلیدلی - جیلیدسیز، کهنه کیتابلا
باسیلیب باشینا تورپاق اله ییب
زمانلاردان اسیب گلن روزگار

سوادسیز، یازیسز ساده ائللرده
قدیملردن قالان بیر عادتده وار
او هر جور کیتابا، هر جور باسقا
ندنسه مقدس گوزیله باخار

اونا حرمتلی دیر هر یازی، هر خط
نه یانديرماق اولار، نه آتماق اولار
(شبهه لی اللردن)) احتراس دئیہ
قاچیردار مسجده، اوجاغا قویار

اونا گوره ده بو بیغوله لرده
بعضا دوغرونداندا آبدہ لر وار
انسان دویغوسونون خزانہ لرین

بو ويرانه لردن، آختارماق اولار

گاهداندا گورورسن بير مجاورين
فاجعه قوپارار زيانكار الى
آنلاماز - آنلايار يئر قازار قويلار
كار - كاغذ قاريشيق، بو اينجى لرى

ايچيمده درين بير آختاريش حسى
((كتابلارى آختار)) ديه - باغيرير!
ائله بيل گورونمز بير سس، بير ندا
تاخچانين ايچيندن منى چاغيرير

كتابلارى بير - بير آچيب باخيرام
جوربه جور قرآن دير آنجاق چوخوسو
بير آن نفسيمى دالى قايتارير
قالخان توز - تورپاغين آجى قوخوسو

بودا، مئشين جيليد قالين بير بياض
دئيه سن، كهنه بير ال يازماسى دير
بوز وراقلارينا قونان لكه لر
تك توز - تورپاق دئيل، زامان پاسيدير

توستولو پوسوزون دار ايشيغيندا
آچيرام قارشىما كهنه بياضى
بورنومدا كيفسه ميش كاغدين ايگى
گوزومو اوخشاير گوزل بير يازى

گوزوم دولانديقجا وراقلاريندا
بياضدان بير قاپى آچيلير منه
قايدا سانكى بير آت باغلانيدير
منى آپاراجاق باشقا عالمه

خياليم سئچرايير آتين بئليه
باخيشلاريم جلو، گوزلر يم يوين
يورتيرام كئچميشين درينلرينه
چاپاراق چيخيرام زامان قيديندن

گونلر، آيلار، ايللر دالي قايدير
قالخير مزاريندان اولو بابالار
قاريچيق آنالار قوللارين آچير
مني قارشيلايير ائلر-اوبالار

آدامي تانيان يئرده قورد يئسين
هاميسي يير به بير اوزومدن اوپور
((اوروز)) پيچيلدايير ((دلي دوندارا)):
" بيلمم نئچه مينجي نوه سيم من "

آذرلر يوردونون شن دوزلرينده
آلاجا سيوانلار يئنه قورولور
شرفيمه بويوك قوناqliق اولور
دوه لر كسيلير، قويون قير يلير

ايتي شرابلارين آغزي آچيلير
اوجاقلار ياخيلير، كبابلار پيشير
هر آن يئني دسته يئتيشير يولدان
ارنلر، خاتينلار آتلاردان دوشور

الرده صراحي اينجه گوزلر
سو سوناسي كيمي سوزور-ساللانير
دولوب بوشالديقجا زر پياله لر
ياناقلار گللنير، توتور-آللانير

جيران سوروسو تک قيزلار - گلينلر
گولوشور، قاجيشير چمنلر اوسته
گاهدان توپلانييدوره قورورلار
الوان چيچک کيمي دسته به دسته

اردملی ايگيتلر، قادين انالار
کيمي صحبت آچير، کيمي ساز چالير
کيمي آت اوينادير، کيمي اوخ آتير
ائلين شنليک سسي عرشه اوجالير

گورک کيملر گلير قوناقلقيما؟
عصرين آدلی - سانلی قهرمانلاری
قاريچيق انالار، قوجا بابالار
اوغوز سويلارينين، اولو خانلاری

((بايندير خان)) گلير، ((بيگ اوروز)) گلير
((قارا گونه)) گلير، ((خان قازان)) گلير
((قيان سلجوق)) گلير، ((بيه رک)) گلير
((دلې دومرول)) گلير، ((بوغاج خان)) گلير...

معرفت يولونون آيدين چراغی
قوجالار قوجاسی، ائللر آتاسی
بئزن ميسگينلرين اميد داياغی
بوتون مشگلرين موشگولگشاسی

((قورقود دده)) گلير اينده قوپوز
اودوملو اينی ارخاما چالير:
- اوغول ائلريوه خوش گلدين دئير
هر طرفدن آلقيش سسي اوجالير

باخيرام ائليمه، بابالار يما

باخديقجا فخر يمدن باشيم اوجالير
اوز گونوم، طالعيم گلير اونومه
گوزوم آياغيما تيکيلي قالير

اوپورم دده نين جومرد ايني:
- آتا، اوغلون همت ديله بير سندن
بيل كي ائلريمين حالي ياماندير
اسيرگه مه خير دعاوي مندن

زاماندير بيزره فلک گوز اگيب
پولاد اوز قيلينجلار قيندا پاسلانيب
شاهباز آيغير لارين پي کسيليب
جيدالار اگيليب، کندير اوفانيب

اودالار تالانيب، ائولر ييخيليب
مرد ايگيتلر اولوب، اوره ک داغلانيب
حصارلار آلينيپ، اوردو باسيليب
دوداقلار تيکيليب، قول لار باغلانيب

آلتونلي بان ائولر، تالانا گنديب
ائوييه سي گنجه کوچه ده ياتير!
بوز بالئاسي کيمي جومرد ايگيتلر
ديوارلار ديبينده پرتقال ساتير!

کولگه لي آغاجلار کوکدن قورويوب
بولاقلار کورلانيب، کهريزلر باتيب
آلجي قوشلارين قانادي سينيپ
اسلان ياتاقيند تولکولر ياتيب

اوبالاردا نه توي نه بايرام اولور
نه قوپوز چالينير، نه مرد اويونور

نه بیر اوزان گلیر نغمه اوخویور

نه بدو آتلارین ایچی دویونور

لاله لی دوزلرده تیکان گویه ریب

نه قوزو مه لشیر، نه جیران قاچیر

قوشلاردا یوردومدان کوسوب گندیبلر

گویده نه بیر دورنا، نه سونا اوچور

معیشت ایگیده آغیر یوک اولوب

کیمی باش گوتورور گندی سرگردان

کیمی بالالارین آلیر دیشینه

قاچیر دیاریندان، دوغما یوردوندان!

دوو توشوب دیر ناقسیز نامرد الینه

دیشی باتان یئرین اتین قوپاردیر

دیل آچیب دیلینده دانیشانلارین

چکیر بوغازیندان دیلین چیخاردیر!

بیرجه دار گونلرین دار آخشامیندا

خلقین احوالینا شافاق قان آغلار

قهرمان ائلیوی نه گونه سالمیش

گور بو قارا دوران، گور بو روزگار

بیر اورک آرادان ایکی بولونوب

آیاقدا قانلیدیر، باشدا قانلیدیر

آغ ساچلی آنالار قارا گئینیب

یاناقدا قانلیدیر، باشدا قانلیدیر!

اوتانیرام سنه ((اوغلونام)) دئیم

بیلیرم یانیندا قارادی اوزوم

دردی من ائشیدن سنی

سن دوزنمه ينده، من نجه دوزوم؟

وطنين شاماماسی
دوغرانيب ديليم - ديليم
تيکيليب دوداغيم
قاداخلانيب ديليم
هر پارچام، هر تیکه م
بیر قورد آغزیندا!
بابامين کسگين قيلينجی
پاسلانيب، چورويوب قیندا
...

نامحرم قوجاقیندا!
مرد ايگيتلريم دارد
بو دیاردا، او دیاردا
...

((آذر لييم)) دئين
پاغاغی قیللی - قیلچيقلی
اوز - گوزو سنگر پالچيقلی
دونمز جومردلريم...
بيلميرم هاردادی...
هار... دا...
قولاغ آس آتا!

بو دردلی اوغلووا قولاغ آس!
هانسی دردیمی دئیم؟
هانسی نيسگيلیمی دئیم؟
سيزدن سونرا نامردلر
دوغراخ - دوغراخ
دوغرادی دیاریمی
دوغرادیلار ایرانیمی...
بیر ووروشدا
اوزون، اوغلون، نوه سین

قربان وئردی ((شئری)) بابام...

...

آلانمادیم قانیمی

بیرده کی نانکورلار

بیر قورو دیلیمیده منیم -

ایمدن آلدیلار

بیر قاریش یئریمدنده

منی بایرا سالدیلا

هارای قوپار تدیم

جان آتدیم

اولمادی - اولمادی

ایندی...

اوروشده بدوو آت شیهه سیندن

نر اوغول نعره سیندن

سس سمیر یوخدو

الرده قالان آنامین

های... هارای چکمکدن

چیخدی جانی:

بابکیم، کوراوغلوم، شاه اسماعیلیم ها... نی؟

دده ملول - ملول باخیر اوزومه

باخیشیندا آیدین بیر اینجیکلیک وار

اولادین پریشان، ناتوان گورسه

شبهه سیز هر آتا مکدر اولار

اوغول نییه مندن همت ایسترسن؟

تورپاق اسیرینین الینده نه وار؟

هر عاشقین بش گون دورانی واردیر

هر عصرین اوزونون بیر ((قورقودو)) وار

کیم اوز ثروتینی قبره آپارمیش؟

یا هانسی آتانی گوردون دونیادا

عمرینده چالیشیب قازاندیغینی
بوراخیب گنتمه یه آخیر اولادا؟

من اوز حیاتیمددا هر نه قازاندیم
عاغیلدان، کمالدان، علم و ذکادان
توخوم ائيله ییین بو یئرده اکدیم
سیز لره تاپشیردیم اولدیگیم زمان

آنجاق هر اوغولون اوزونه قالیر
آتا ثروتیندن نجور بارینا
بیر گونده کول اندیب گویه سووورا
یاداکی قات - قاتدا، آرتیرا اونا

بیز اگر باش اوجا، ایگیت یاشادیق
نامرده اگمه دیک اونو هئچ زمان
یاد ائلی دشمانا تسلیم اولمادیق
قانیمیز آخدیسا داماریمیزدان

دورد اللی توتمادیق بیز بو دونیانی
حیاتی، شرفده، مردلیکده بیلدیک
یاشادیق، شرفلی یاشاماق اوچون
ساواشدیق، ووروشدیق، اولدوردیک، اولدیک

گویلره یورد سالدیق قارقوش کیمی
قارقاقوزغون اولوب، لئشه قونمادیق
اسلان تک جب لرده یاتاق ائيله دیک
تولکو تک گونده مین کلک یونمادیق

نامرده مرد اولدوق، حقه قول اولدوق
یاخشی، یاخشی اولدوق، یامانا، یامان
السیز لری ازیب آیاخلامادیق
آمانسیز دشمانا، وئرمه دیک آمان

اوغولا نه گرک دده نین مالی
اگر اوغول اولسا، اگر مرد اولسا!
آتانین ثروتی هارا چاتاجاق
اوغول دده سینه یامان درد اولسا!

آتانین آدینی باتیران اوغول
آتانین یوردوندا قالماسا اییدیر
ایگیتده، ایگیت لیک، ناموس، عار گرک
ناموس سیز اوغوللار اولماسا اییدیر!

اوغول نییه مندن همت ایترسن؟
تورپاق اسیرینین الینده نه وار؟
هر عاشیقین بئش گون دورانی واردیر
هر عصرین اوزونون بیر ((قورقودو)) وار

من اوز زمانه می یاخشی تانیدیم
یاخشی یول گوستردیم، یاخشی یول گتتدیم
اثلیمه اوستاد بیر گمیچی اولدوم
توفانلاردان کئچدیم، ساحله یئتدیم

سنده اوز عصریوی دریندن تانی
گز - دولان زامانین ((قورقودون)) آختار
راکت دورانیندا، آتم عصرینده
اپریمیش ((قورقدان)) سیزه نه چیخار؟

هر زامان باش اوجا یاشاماق اوچون
او عصرین هنرین اویرنمک گرک
آتایا گوونمک هنر دئییلدیر
دونیادا هنره گوونمک گرک
گئت قوجا دده دن همت دیله مه

همت وئره جكسن، همتين اولسا!
آتاوين چيراغين يانار ساخلارسان
شرفين، هنرين، غير تين اولسا!

منيمده اليمدن بو گلير آنجاق
سنى كئچميشونله ائيله يم تانيش
باش اوجا ياشاماق ايسته سن اكر
باخ گور بابالارين نئجه ياشارميش

من بو دونيالاردا گزيشن زامان
بيلميرم نه ساعت يوخوم آپاير
يا منيم كونلومو رويالار آلير
ياداكي پوزوسون ياغي قورتاير

بير زامان آيلديم آچديم گوزومو
ايشيق قارانليقي باسيب بو غوردو
گنجه نين شلمه سي قانا باتميشدى
سحر آچيليردى، گونش دوغوردو

((دده مين)) ايريميش، توزلو كيتاين
بير آبدە كيمي قوجاقلاميشديم
گنجه مي سحره چاتدير ميشديمسا
بير وراخدان آرتيق اوخومايشديم

سون